

que los que tuviesen las dichas bestias, asi cavallos como mulas e mulos que fuesen mancos o viejos, que los pudiesen vender a qualesquier personas vezinos de la dicha çibdat o del su termino, que fuesen abonados en tanta quantia quanta valliese el cavallo o mulo o mula que comprasen. E nos tuvimoslo por bien, porque vos mandamos que daqui adelante, onde que acaesçiere que algunos vezinos de la dicha çibdat tuvieren algunos cavallos o mulos o mulas que fueren mancos o viejos o los quisieren vender, que les consintades que los vendan, pero todavia que aquellos compraren que sean vezinos de la dicha çibdat e de su termino, e que sean abonados fasta en tanta quantia quanto montare el cavallo o mulo o mula que compraren, e que les non pongades embargo alguno en ello, ni les prendedes, ni tomedes, ni embarguedes ninguna ni alguna cosa de lo suyo, por razon del dicho nuestro ordenamiento. E non fagades ende al por ninguna manera, so pena de la nuestra merçed e de seysçientos maravedis a cada uno de vos.

Dada en Salamanca, catorze dias de mayo, era de mill e quatroçientos e diez e nueve años. Nos, el rey.

(75)

**1381-V-14. Salamanca.— Carta de Juan I al Concejo de Murcia, otorgando permiso para vender moros cautivos a Aragón. (A.M.M., C.R. 1384-91, Fol. 17, r.)**

Don Johan por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara e de Vizcaya e de Molina, al conçeio e cavalleros e ofiçiales o omes buenos de la çibdat de Murçia, salud e graçia. Fazemos vos saber que viemos vuestra pitiçion que nos enbiastes, e a lo que nos enbiastes dezir en como algunos vezinos de esa dicha çibdat que tienen moros e moras cativos e que non se quieren rendir ni fallan y quien ge los conpren, e que nos pediedes por merçed que mandasemos que los que tales moros e moras tuviesen cativos que los pudiesen levar a vender al regno de Aragon syn pena alguna, pagando los nuestros derechos por ellos segund se deven pagar. Sabed que nos plaze dello e tenemos por bien que de aqui adelante qualquier o qualesquier vezinos e moradores de esa dicha çibdat que tuvieren algunos moros e moras cativos que los puedan levar o enbiar a vender al dicho regno de Aragon, pagando por ellos los nuestros derechos que ovieren de pagar, segund que es acostunbrado. E por esta nuestra carta mandamos a las nuestras guardas de las sacas de las cosas vedadas del obispado de Cartajena con el regno de Murçia que agora son o seran daqui adelante, e a qualquier o qualesquier dellos, que les non pon-



gan embargo en ello e que lo consientan asi fazer. E non fagades ende al por alguna manera, so pena de la nuestra merçed e de seyzentos maravedis desta moneda usual a cada uno.

Dada en Salamanca, catorze dias de mayo, era de mill e quatroçientos e diezinueve años. Nos, el rey.

(76)

**1381?-V-15. Salamanca.— Carta de Juan I respondienddo a peticiones del Concejo sobre sacas. (A.M.M., C.R. 1384-91, Fol. 16, v.)**

Don Johan por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara e de Vizcaya e de Molina, al conçeio e cavalleros e ofiçiales e omes buenos de la çibdat de Murçia, salud e graçia. Fazemos vos saber que Sancho Rodriguez de Palençuela e Sancho Gonzalez de Harroniz e Anton Avellan, de los Cavalleros que an de ver fazienda de vos, el dicho conçeio, e Johan Martinez de Aguera e Bartolome de Navarrete, jurados, vuestros procuradores, paresçieron ante nos e truxieron vuestra procuraçion, segund que nos vos lo enbiamos mandar; e ellos en vuestro nonbre fizieron e otorgaron todas aquellas cosas que a nuestro serviçio cunplia, segund que lo fizieron los otros procuradores de los nuestros regnos. Otrosy, los dichos vuestros procuradores nos mostraron algunas petiçiones que con ellos nos enbiastes dezir. E en razon del agravio que dezides que las nuestras guardas de las sacas de las cosas vedadas fazian a los naturales del regno de Aragon.

E otrosi, en razon de la yda del conde de Carrion para alla, a esa çibdat. Sabed que non vos enbiamos agora responder a las dichas cosas por quanto ante que estas vuestras petiçiones nos enbiasedes vos, aviemos enbiado responder a ello segund que entendimos que cunplia a nuestro serviçio. E a las otras petiçiones que nos enbiastes, sabed que nos vos fizimos nuestra respuesta segund veredes por las cartas que sobre ello mandamos dar.

Dada en Salamanca, quinze dias de mayo. Yo, Johan Sanchez la fize escrivir por mandado del rey.

